

Inissianik sanaartornermut tapersersuisarnek taarsigassarsititsisarnerlu pillugit inatsisini seqerngup maligaasaanik aammalu nukissiuutunik ataavartunik allanik atortulersornissamut aningaasartuutit ilaannik matussusiissutissanik taperserneqarnissamik periarfissaqalersitsinissaq siunertaralugu Naalakkersuisut sulissuteqarnissaannik Inatsisartut aalajangiiffigisassaattut siunnersuut
(ATASSUT-ip Inatsisartuni ilaasortaaitai: Finn Karlsen, Siverth K. Heilmann, Knud Kristiansen)

Akissuteqaat

(Ineqarnermut, Attaveqarnermut Angallannernullu Naalakkersuisoq)

Siullermeerneqarnera

Aalajangiiffigisassatut siunnersuummi tunngavissat pingaaruteqartut pitsaasullu saqqummiunneqarmata Naalakkersuisuniit qujavugut. Siunnersuut isumassarsiatsialattut Naalakkersuisuniit isumaqarfigaarput, taamaattorli isummersuutivut imaattut saqqummiutissallugit.

Nukissiuutini ataavartuni suliniutit aammalu nukissiornermik sipaarniarluni suliniutit, aningaasaqarnikkut pissarsiaqarfiusinnaasumik aammalu aningaasaliissutit imminut akilersinnaaffii eqqumaffigalugit ingerlanneqartarnissaat pingaaruteqarpoq.

Namminersorlutik Oqartussat nukissiuutininut ataavartunut teknologiimik ineriartortitsinerneq ilisimatusarnernullu ukiumoortumik Aningaasanut Inatsit aqqutigalugu tapersiisarput. Taamaattumik innuttaasut, suliffeqarfii kattuffiillu inuiaqatigiinni nukissiuutininik ineriartortitsinerneq suliqataarusuttut tapersersorneqartareerput. Aningaasanik pissarsitinneqarnissamut kontomi tassani maleruagassat atuuttut naapertorlugit qinnuteqartoqartussaavoq. Qinnuteqartoq aningaasanik tunineqarnermini, suliniutip pineqartup sunniutaa pillugu nalunaaruteqarnissamut pisussaaffilerneqartarpoq. Taamaalilluni inuiaqatigiinni nukissiuutininik ataavartunik ineriartortitsinerneq ilisimasalik qitiusumik katersuisoqarnissaa qulakkeerneqartarpoq.

Tamatuma saniatigut Naalakkersuisut oqaatigisinnaavaat, Grønlandsbanken avatangiisinut tunngatillugu taarsigassarsinissalik nutaanik immikkoortitsisimammat, taakkunanga inissiani suliniutininut nukissiuutininik sipaarniarfiusinnaasunut taarsigassarsinissaq sullitanut neqeroorutigineqarluni. Taarsigassarsiat ilaatigut assersuutigalugu inissiat nutaanik oqorsaasersornissaannut, igalaalersornissaannut seqernullu maligaasai atorlugit kiassarneqarnissaannut atorneqarsinnaapput. Grønlandsbanken tamatumunnga 50 millioner koruunilik immikkoortitsivoq.

Naalakkersuisut isumaat malillugu nukissiuutininut ataavartunut, soorlu seqernup maligaasaanik nukissiuutininut taarsigassarsinissamut periarfissaqartoqareermat, suliniutissanik allanik ineqarnerneq inatsisit atuuttut ilassuserneqarnissaat pisariaqanngilaq. Taamatutaaq oqaatigineqarsinnaavoq, Nunap Karsiani isumalluutissat killeqartut pisariaqartitsiviunerpaat iluaqusiiffiunerpaasussallu salliutillugit atorneqartussaammata.

Taamaattumik aalajangiiffigisassatut siunnersuutip taparserneqarnissaa Naalakkersuisuniit inassutigisinnaangilarput.